

## Morning Regional Dogri News Bulletin, 11<sup>th</sup> October 2024

मार्निंग डोगरी न्यूज़ बुलेटिन, समें. 09-20 Hrs



### Headlines

- 1 प्रधानमंत्री नरेन्द्र मोदी होर अज्ज लाओस दे वियनतियाते शैहर च 19में पूर्वी एशियाई शिखर सम्मेलन च हिस्सा लैगन।
- 2 जम्मू दे डिप्टी कमीशनर सचिन कुमार वैश्य होरें जिले च डेंगू दी रोकथाम ते एहदे नै निबड़ने सरबंधी उपाएं दा कल इक बैठक दरान जायजा लैता।
- 3 फौज दी 16 कोर दे जीओसी होरें राजौरी जिले च अगेत्रे इलाके दा दौरा लाइयै फौजी कारवाइएं मत्तलक तैआरिएं दा जाजया लैता।
- 4 मुख्य भरै च अज्ज महानोमी दा पर्व पूरी धार्मिक श्रद्धा ते आस्था कन्नै मनाया जा'रदा ऐ।



### PM Modi

प्रधानमंत्री नरेन्द्र मोदी होर अज्ज वियनतियाते लाओस पीडीआर च 19में पूर्वी एशिया शिखर सम्मेलन च शामिल होंगन। पूर्वी एशिया शिखर सम्मेलन अगुआ लीडरें दी अगुवाई आला मंच ऐ जेहछा इलाके च सामरिक भरोसे दा वातावरण तैआर करने च योगदान दिंदा ऐ। एह सम्मेलन भारत सनें एहदे च हिस्सा लै करदे देशें दे लीडरें गी इलाकाई महत्व दे मसलें पर विचारें दा बादान-प्रदान करने दा मौका उपलब्ध करांदा ऐ। प्रधानमंत्री मोदी होर लाओस पीडीआर दे राष्ट्रपति हुंदे कन्नै मुलाकात करगंन। श्री मोदी होर कल वियनतियाने च 21में आसियान भारत शिखर सम्मेलन च शामिल होए हे, उनें इस दरान सम्मेलन च भाषण बी दित्ता हा। ध्यानजोग ऐ जे लाओस मजूदा समें दे आसियान समूह दा अध्यक्ष ऐ।



### DC Jammu-Dengue

जम्मू दे डिप्टी कमीशनर सचिन कुमार वैश्य होरें कल इक बैठक लोआइयै जिले च डेंगू दी रोकथाम लेई कीते जा'रदे हिलें दा जायजा लैता। इस दरान डीसी होरें डेंगू बारे लोकें गी जानकार करने लेई गलाया। उनें डेंगू दे इलाज ते मजूदा डेंगू दे मामले गी सशक्त तरीके कन्नै नियंण च रखने दे निर्देश जारी कीते। बैठक च डीसी होरें गी जानकारी दित्ती गई जे घर-घर जाइयै डेंगू दे मामलें दी पंछान लेई सर्वेक्षण कीते जा'रदे न ते

अजें तगर 4 लक्ख शा मते घरें दा सर्वेक्षण कीता जाई चुके दा ऐ। नीजि अस्पतालें ते लैबारटिएं गी निर्देश दित्ते गे न जे डेंगू दे मामले उप्पर नेड़मी तक्क रखन ते ओहदे बारे पूरी जानकारी जिला प्रशासन कन्नै सांझी करन। डीसी होरें लोके गी बी अपील कीती जे ओह डेंगू दा कोई बी लक्षण मसूस करदे न तां आपूं दवाई नेई लेइयै अस्पताल जान।



## Defence

फौज दी 16 कोर दे जनरल आफिसर कमांडिंग नैफिटनेंट जनरल नवीन सचदेवा होरें आतंकवाद-रोधी बलरोमियो दे जीओसी हुंदे कन्नै बन्ने आले जिले राजौरी च डेरा की गली दा दौरा लाइयै इलाके च सुरक्षा ते फौजी कारवाइएं मत्तलक तैआरिएं दा जायजा लैता। फौजी कमांडरें, आतंकवाद-रोधी अभियानें गी कामयाबी कन्नै तोड़ चाढ़ने ते सतर्कता बनाई रखने लेई जुआनें दी सराहना कीती। लैफिटनेंट जनरल सचदेवा होरें **Crossed Swords** डिवीसन दे जीओसी हुंदे कन्नै एहदे शा पैहले जंदे बुधवारें जम्मू जिला दे अखनूर ते प्लावाला दे अगेत्रे इलाके दा दौरा लाइयै फौजी कारवाइएं सरबंधी तैआरिएं दा जायजा लैता हा।



## NC Vice President

नैशनल कांफ्रेंस दे उपप्रधान उमर अब्दुल्ला होरें गी कल श्रीनगर च लग्गी दी पार्टी विधायक दल दी बैठक च मुख्मन्त्री दे औहदे दा मेदवार चुनेआ गोआ। इस बैठक दी प्रधानता नैशनल कांफ्रेंस दे प्रधान डॉ. फारुक अब्दुल्ला होरें कीती ते इस दरान कांग्रेस पार्टी कन्नै रलियै जम्मू कश्मीर च सरकार बनाने बारे बी चर्चा कीती गोई। नैशनल कांफ्रेंस दे सब्बै नमें चुने गोदे विधायकें इस बैठक च हिस्सा लैता। बैठक दरान गठबंधन दी सरकार लेई सांझे घट्टोघट्ट प्रोग्राम पर बी ध्यान केन्द्रित कीता गोआ। पार्टी दे सूत्रें मूजब कांग्रेस पार्टी दे प्रदेश प्रधान तारिक हमीद कर्रा हुंदे दिल्ली थमां परतोने मगरा कांग्रेस दी बी इस किस्म दी बैठक दा सरिस्ता कीता जाग।



## DDC Kishtwar

किश्तवाड़ दे जिला विकास कमीशनर राजेश कुमार श्रवन होरें कल इक बैठक लोआइयै जिले च जल जीवन मिशन दी अमलावरी दा जायजा लैता। बैठक दा उद्देश्य जिले च चला'रदे सब्बने पानी सव्लाई सरबंधी परियोजनाएं दी मजूदा स्थितिएं दा जायजा लैना ते सब्बने कम्में गी तैह समें उप्पर मुकम्मल करने गी तरजीह

देना हा। इस मौके जिला प्रशासन होरें कम्म तोड़ चाढ़ा'रदिएं अजेंसिएं गी कम्मं गी समें सिर मुकम्मल करने दे निर्देश दित्ते।



## DC Reasi

रियासी दे जिला विकास कमीशनर विशेष महाजन होरें जिला स्तरीय जायजा कमेटी दी बैठक लाइयै जिला दोआर योजना तैहत बैंकिंग क्षेत्र दिएं हासल उपलब्धिएं दा जायजा लैता। डीडीसी होरें इस मौके बैंक दे अधिकारिएं गी दूर दरेड़े थाहरें जियां ठाकराकीट, माहौर ते होर दुइएं थाहरें च एक्सटेंशन केन्द्र स्थापत करने ते सरकारी विभागें दी सांझ भ्याली कन्नै दनें इलाकें च कैपें दा आयोजन बी करन। डीडीसी होरें सब्बने बैंकें गी राईबाई, शिक्षा ते रोजगार क्षेत्र दे इलावा होर दुए सेक्टरें गी लौहके दोआर कर्ज देने लेई बी गलाया तां जे लोकें गी बक्ख-बक्ख स्कीमें थमां लाह हासल होई सकै। उनें राईबाई ते बैंक अधिकारिएं गी प्रधानमंत्री फसल बीमा योजना दा अमलावरी गी जकीनी बनाने लेई बी गलाया तां जे करसानें गी वित्तीय सुरक्षा उपलब्ध कराई जाई सकै।



## LG-Mahanavmi

देश दे बक्ख-बक्ख हिस्से आला लेखा महा नौमी दा ध्यार अज्ज जम्मू च बी धार्मिक श्रद्धा ते आस्था कन्नै मनाया जा'रदा ऐ। महानौमीं 9 दिन चलने आले नरातें दे खीरले दिन गी दर्शादी ऐ। इस दिन लोक 9 दिन रखे नराते दे व्रत पोआ'रदे न। महा नौमी दा ध्यार मां दुर्गा हुंदी राद्दास महिषासुर उप्पर जित्त दा प्रतीक ऐ। उपराज्यपाल मनोज सिन्हा होरें अज्ज महानौमीं दे घ्यार दियां सब्बने लोकें गी मुबारकबाद दित्ती ऐ। अपने सनेह च उपराज्यपाल होरें गलाया जे ओह अज्ज दे इस पवित्र ध्याड़े दियां सब्बने गी मुबारकबाद दिंदे न। राष्ट्रपति द्रौपदी मुर्मू होरें दुर्गा पूजा दे मौके पर देश विदेश दे लोकें गी शुभकामना दित्तियां न। राष्ट्रपति होरें अपने सनेह च आखेआ ले दुर्गा पूजा बेन्याई पर न्याय ते झूठ पर सच्चाई दी जित्त ते दलेरी दा प्रतीक ऐ। एह ध्यार देवी दुर्गा दे प्रति पूरी चाल्ली समर्पण ते सब्बने धर्म च इक जुटता ते समोद गी बढ़ावा देने दा मौका ऐ। उनें मां दुर्गा कोला इक नेह समाज दी कामना कीती जित्थें महिलाएं गी आदर ते मान सम्मान थहोए।



## Basohli Utsav

सलाना बसोहली उत्सव कल्लै थमां शुरू होई गेआ ऐ। इस उत्सव च जिले दी शानदार ते जीवंत सांस्कृतिक विरासत दा छलैपा दिखने गी लब्धोग। कल इस उत्सव दे पैहले ध्याड़े रंगारंग सांस्कृतिक प्रस्तुति नै उत्थें मजूद लोकें दा मन परचाई लैता। संस्कृति विभाग दे प्रधान सचिव सुरेश कुमार गुप्ता होर इस उत्सव दा उदघाटन कीता ते गलाया जे एह आयोजन बसोहली दे ऐतिहासिक गौरव दे संरक्षण खास करियै कला ते विरासत च एहदी समृद्धपरम्परा दे संरक्षण दी दिशा च पुट्टी गेदी बड़ी महत्वपूर्ण गैह ऐ। इस मौके पर उनें बसोहली दिएं चित्रकारिएं ते नशमीना गी थोए दे जीआई टैग दे महत्वै दा बी जिक्र कीता जेहदे कन्नै पक्क गै मकामी कारीगिरें ते दस्तकारें लेई कम्म रोजगार दे नमें मौके पैदा होंगन। त्रौ दिनें दे इस बसोहली उत्सव दरान सांस्कृतिक कार्यक्रम, प्रदर्शनिएं ते कार्यशालाएं दा सरिस्ता कीता गेआ।



### Chief Secretary

जम्मू-कश्मीर दे मुख्ख सचिव अटल डुल्लू होरें भारत दी सब्बनें शा लम्मी साइकल यात्रा गी झंडी दस्सिए रवाना कीता जेहड़ी श्रीनगर दे पोलो व्यू ग्राउंड थमां शुरू होई ते मुख्खै दे दक्खन च सब्बनें शा दूर स्थित कन्याकुमारी च सम्पन्न होग। मुख्ख तौरा पर भारती तेल निगम लिमिटेड आस्सेया प्रायोजित “रेस एक्रास इंडिया” विषय सार दी इस रैली दा एह दूआ संस्करण ऐ जेदे च भारत दे अलावा बाहरां आए दे साइकल सवार बी हिस्सा लै करदे न। इस मौके मुख्ख सचिव होरें जम्मू-कश्मीर खेड्ड परिषद ते इंडियन ऑयल कार्पोरेशन लिमिटेड दी सराहना कीती। उनें मेद प्रगट कीती जे एह आयोजन भविक्ख च हर साल दा आकर्षण बनदा रौहग। उनें आखेआ जे केंद्र शासित प्रदेश च हून अंतरराष्ट्रीय स्तर दे जिन्ने बी आयोजन कराए जंदे न, उंदे च लोक बधी चढ़िए हिस्सा लैने लेई दुनिया भरै थमां औंदे न। उनें एल्लै चला करदी लेजेंड्स लीग क्रिकेट ते कश्मीर मैराथन दा विशेष तौरा पर जिक्र कीता। इस साइकिल यात्रा च 22 टीमां हिस्सा लै करदियां न ते एह 3 ज्हार 700 किलोमीटर कोला बी लम्मा पैंडा तैह करडन।



### DC Rajouri

राजौरी दे डिप्टी कमीशनर अभिषेक शर्मा होरें कल इक बैठक लोआइयै राजौरी थन्नामंडी सुरनकोट शिडक परियोजना दे कम्में च आवा'रदिएं दिक्कतें दा जायजा लैता। डिप्टी कमीशनर होरें सब्बने मसलें दा हल फौरी तौरा पर करने लेई गलाया। बैठक च एह बी फैसला कीता गेआ जे पीडब्ल्यूडी, पुलस ते मैजीस्ट्रेट दी इक टीम ATTI थाहर दा दौरा लान।



### International Girl Child

अज्ज अंतराश्ट्रीय बलिका दिवस ऐ। एह ध्याड़ा दुनिया भरै व कुड़िएं दे लैंगिक, बराबरी, शिक्षा ते इक बरोबर मौके दे महत्व पर लोह पांदा ऐ। इस ब'रे इस ध्याड़े दा विशे सार भविक्ख दे प्रति कुड़िएं दी संकल्प दृष्टि। एह ध्याड़ा कुड़िएं गी सशक्त बनाने ते उंदे मनुक्खी अधिकारें दी सुरक्षा जकीनी बनाने दी जरूरते पर बी जोर पांदा ऐ।

